



ԳԻՐ ՀԱՅՐԱՊԵՏԱԿԱՆ ՕՐՀՆՈՒԹԵԱՆ
ՄԻՐԵՅԵԱԼ ՈՐԴԻՈՑ ՄԵՐՈՑ ԵՒ ՀԱՐԱԶԱՏ ԶԱՒԱԿԱՑ
ՄԱՅՐ ԱԹՈՌՈՑ ՍՐԲՈՑ ԷԶՄԻԱԾՆԻ
ԱՆԴԱՄՈՅՆ ԹԵՄԱԿԱՆ ՊԱՏԳԱՄԱԻՈՐԱԿԱՆ ԺՈՂՈՎՈՅՆ
ԿԱՆԱԴԱՅԻ ՀԱՅՈՑ ԹԵՄԻ, ՈՐ Ի ՄՈՆՐԷԱԼ, ԿԱՆԱԴԱ

Կանադայի Հայոց Թեմի Թեմական Պատգամաւորական ժողովի առթիվ Միածնաէջ Մայր Աթոռից Հայրապետական Մեր օրհնութիւնն ենք յղում բարեջան առաջնորդ Գերաշնորհ Տ. Արգար եպիսկոպոս Հովակիմեանին, թեմի հոգևոր ուխտապահ դասին, թեմական ու ծխական խորհուրդների անդամներին և կանադահայ հաւատաւոր Մեր բոլոր զաւակներին:

Գոհունակութեամբ ենք անդրադառնում, որ Կանադայի Հայոց Թեմը արդիւնատուութեամբ շարունակում է տիրաւանդ առաքելութիւնը Կանադայում բնակեալ մեր ժողովրդի կեանքում: Հոգևոր սպասաւորներիդ, թեմական ու ծխական կառոյցների անդամներիդ նուիրեալ ջանքերի ու յանձնառութիւնների շնորհիւ Քրիստոսասէր Մեր զաւակները, միաբանուած մեր եկեղեցիների հովանու ներքոյ, շարունակում են կենսունակ պահպանել իրենց ազգային ու հոգևոր կեանքի անդաստանը՝ դրոշմուած հաւատի շնչով և զարդարուած աստուածահաճոյ իրագործումներով: Ամենքիդ բերելով Մեր գնահատանքը՝ յաջողութիւններ ենք մատչում Թեմական Պատգամաւորական ժողովի աշխատանքներին՝ ի նպաստ թեմի առաւել շինութեան ու պայծառութեան:

Վստահ ենք՝ քաջատէղեակ էք հայրենի մեր երկրում այն խնդիրներին ու դժուարութիւններին, որոնց շարունակում է բախուել Առաքելական մեր Սուրբ Եկեղեցին: Հայաստանի իշխանութիւնների կողմից արդէն ամիսներ շարունակ իրականացուող ապօրինութիւններն ու ճնշումները Մայր Աթոռ Սուրբ Էջմիածնի և մեր եկեղեցականների հանդէպ էականօրէն խոչընդոտում են Հայաստանեայց Առաքելական Սուրբ Եկեղեցու հոգևոր, կրթական ու ազգային գործունէութիւնը: Մահմանադրութեան ու օրէնքների ակնյայտ խախտումներով տնական ժամանակ ազատութիւնից զրկուած են բարձրաստիճան հոգևորականներ, եկեղեցասիրութեամբ յայտնի ազգային բարերարը և նուիրեալ այլ հայորդիներ: Մասեացունի թեմի առաջնորդի պաշտօնից ազատուած և կարգալոյծ հոչակուած անձը դատարանի ու հարկադիր կատարումն ապահովող ծառայութեան ապօրինի որոշումներով շարունակում է աշխարհիկ կարգավիճակով զաւթուած պահել առաջնորդարանը և գործել որպէս թեմակալ առաջնորդ՝ տնօրինելով թեմի միջոցներին: Կարգալոյծ նախկին հոգևորականներ իշխանութիւնների ակնյայտ հովանաւորչութեամբ զաւթուած են պահում վանքեր ու եկեղեցիներ և իրենց

հակականոնական, սրբապիղծ գործողություններով շարունակում են խռովել մեր հաւատացեալների հոգևոր կեանքը: Դադարեցուած է Հայոց Եկեղեցու պատմութիւն առարկայի դասաւանդումը կրթական հաստատութիւններում, միակողմանիօրէն լուծարուած է Հայոց բանակի հոգևոր առաջնորդութիւնը և Քրեակատարողական հիմնարկների հոգևոր ծառայութիւնը: Հայոց բանակում եւ ազատագրկման վայրերում գնդերեց քահանաների և բանտերի փորձառու հոգևոր հովիւների հոգեխնամ գործունէութեան փոխարէն ծառայութիւնների մատուցման ապօրինի պայմանագրեր են կնքուում որոշ հոգևորականների հետ՝ շրջանցելով Մայր Աթոռը, որն, անտարակոյս, ունենալու է կարգապահական հետևանքներ: Շինծու գործերով արգելուած է ինչպէս Մեր, այնպէս և Գերագոյն Հոգևոր Խորհրդի անդամ հոգևորականների՝ երկրից ելքի իրաւունքը, որի պատճառով չկարողացանք նաեւ մասնակցել Աւստրիայում նախատեսուած Եպիսկոպոսաց ժողովին, այցելութիւններ կատարել Սփիւռքի մեր համայնքներ եւ անգամ ներկայ լինել Վրաց Ուղղափառ Եկեղեցու Պետի յուղարկաւորութեան արարողութեանը: Հայաստանում տեղի ունենալիք առաջիկայ խորհրդարանական ընտրութիւններին ընդառաջ գործող իշխանական կուսակցութիւնը ՀՀ սահմանադրութեան և օրէնքների կոպիտ խախտումով իր նախընտրական ծրագրում ընդգրկել է այսպէս կոչուած «եկեղեցու բարենորոգութեան» դրոյթ, որի շրջանակներում նախատեսուում է պետական միջամտութեամբ վերատեսութեան ենթարկել եկեղեցական դարաւոր կարգն ու կանոնը, հրաժարական պարտադրել Ամենայն Հայոց Կաթողիկոսին, և Եկեղեցին, ըստ էութեան, ենթարկեցնել քաղաքական իշխանութեանը: Ցաւալի է, որ նաև որոշ հոգևորականներ տեղի են տալիս խոտոր ընթացքների՝ նպաստելով հակաեկեղեցական գործողութիւններին կամ դառնալով դրանց մասնակից:

Այս պայմաններում, հակառակ յարուցուած դժուարութիւնների, մեր Սուրբ Եկեղեցին անշեղ ընթացքով շարունակում է իր առաքելութիւնը մեր ժողովրդի կեանքում՝ ծառայելով ազգային մեր իղձերի ու երագների իրականացմանը: Քաջալերական է, որ հաւատաւոր մեր ժողովուրդը հաստատակամ է իր եկեղեցասիրութեան մէջ և զօրակից մեր Սուրբ Եկեղեցուն՝ դիմակայելու բոլոր մարտահրաւերներին ու փորձութիւններին: Այս առումով անհրաժեշտ է, որ աշխարհասփիւռ մեր թեմերը և եկեղեցական կառոյցները ևս գործնական ջանքներ ներդնեն՝ ի նպաստ մեր Սուրբ Եկեղեցու իրաւունքների պաշտպանութեան և նրա վարկի ու հեղինակութեան անսասանութեան: Վստահ ենք, որ ինչպէս պատմութեան ընթացքին, այսօր էլ Հայոց Եկեղեցին յաղթահարելու է այս իրավիճակը՝ թոյլ չտալով ոտնահարել կամ կամայական փոփոխութիւնների առարկայ դարձնել դարերով նուիրագործուած եկեղեցական մեր կանոնակարգն ու աւանդոյթները:

Այս դժուարին իրավիճակում Առաքելական մեր Սուրբ Եկեղեցին ջանքեր է բերում՝ զօրացնելու համազգային միաբանութիւնը և մեր ժողովրդի կարողութիւնները նպատակաուղղելու առկայ խնդիրների լուծմանը: Սիրելիներ, մեր ազգային իղձերի ու նպատակների իրագործման, մեր նոր յաղթանակների ու ձեռքբերումների կերտման

ճանապարհը Հայրենիքի և Մփիւոքի զօրացումն է՝ աշխարհասփիւռ հայորդեաց նուիրեալ աշխատանքով, ազնիւ յանձնառութիւններով ու զոհողութիւններով:

Պատգամաւորական ժողովի առիթով Մայր Աթոռ Սուրբ Էջմիածնից Հայրապետական Մեր օրհնութիւնն ու զնահատանքն ենք յղում Թեմակալ բարեջան Առաջնորդ Գերաշնորհ Տ. Արգար եպս. Հովակիմեանին, հոգևոր դասին, թեմական ու ծխական խորհուրդների, տիկնանց ու երիտասարդաց միութիւնների, կրթական, մշակութային ու բարեսիրական հաստատութիւնների պատուարժան անդամներին՝ կանադաբնակ մեր ժողովրդին մատուցած բեղուն ու նուիրեալ ծառայութեան, ինչպէս նաև դժուարին այս ժամանակներում Սուրբ Էջմիածնի կողքին լինելու և Հայոց Եկեղեցու կանոնական իրաւունքը անխաթար պահպանելու նախանձախնդրութեան համար: Միրելիներ, ի խորոց սրտի մաղթում ենք Ձեզ նորանոր յաջողութիւններ ու ձեռքբերումներ՝ ի նպաստ թեմի պայծառութեան և հաւատացեալ հայորդեաց բարօրութեան:

Թող Ամենակալ Տէրն Իր օրհնութեան ներքոյ հանապազ անսասան ու անխոռով պահի Կանադայի Հայոց Թեմը և Առաքելական մեր Սուրբ Եկեղեցին, խաղաղութիւն պարզևի աշխարհին համայն ու բարօրութիւն ամենուր մեր ժողովրդին:

Ողորմութիւն Աստուծոյ, շնորհք և սէր Յիսուսի Քրիստոսի եղիցին ընդ ձեզ. ամէն:

Օրհնութեամբ՝



ԳԱՐԵԳԻՆ Բ

ԿԱԹՈՂԻԿՈՍ ԱՄԵՆԱՅՆ ՀԱՅՈՑ

Տուաւ Գիրս Օրհնութեան 22-ն Մայիսի
յամի Տեառն 2026 և ի թուին հայոց ՌՆՀԵ
ի մայրավանս Սրբոյ Էջմիածնի
ընդ համարաւ 2378